

NAQQIUT
15.08.2024-meersumut taarsiut
(Aaqqiissutit)

Unnuinermut akitsuut pillugu Inatsisartut inatsisissaattut siunnersuut
(Aningaasaqarnermut Akileraartarnermullu Naalakkersuisoq)

Saqqummiineq

Siullermeenera

Unnuinermut akitsuutinik atuutilersitsinissamut siunnersuut Naalakkersuisut sinnerlugit matumuuna saqqummiuppara.

Inuit Ataqtigiit, Siumut, Naleraq, Atassut taamanikkullu attaviitsoq unnuinermut akitsuutit atuutilersinneqarnissaannut periarfissat misissorneqassasut 2024-mut aningaasanut inatsit pillugu isumaqtigiissummi isumaqtigiissuteqarput. Tamanna tunngavigalugu siunnersuutigineqarpoq takornarianut unnuinermut akitsuut inummut ataatsimut unnuamut ataatsimut 30 kr. atuutilersinneqassasoq.

Naalakkersuisunut pingaaruteqarpoq, immikkoortut takornariaqarnerulernermik sunnerneqartut takornarissanut innuttaasunullu iluaqutaasumik tikeraanik tikittartut aqutsinissamut isumalluutinik aamma sakkussaqaartinneqassasut.

Akitsuummi siunertaq tassaavoq kommunit najukkami nunallu immikkoortuani takornariartitsisarnermik ineriartortitsinissamut periarfissinnissaat. Taamaammatt akitsuummit isertitat allaffissornikkut aqutsinermut nakkutilliinermullu nunap karsianut taarsiissutit pinnagit kommunit akornanni agguanneqartassapput. Kommunit aningaasat sumiiffinni takornariaqarnerulernermik sunnerneqarfiusuni pinaveersaartitsinermut il.il. imaluunniit kommunimi takornariartitsisarnerup ineriartortinnerata siuarsarneranut suliniutinut atornissaannut piginnaatinneqassapput.

Inuit nunanit allaneersuut unnuineri akitsuuserneqassapput nunatsinnilu najugallit akitsuuserneqarnatik. Tamanna atuuppoq inuussutissarsiorneq sunngiffimmiluunniit sammisaqarnissaq angalanermi siunertaanersoq apeqqutaatinngu. Tamanna ilaatigut pissaq aaqqissuussinerup allaffissornikkut aqunneqarnera sapinngisamik ajornaatsuunissa qulakkeerniarlugu. Ilaatigut akitsuummit iluanaarutit takornariaqarnermut, takornarianik iluaqutaasartunut, atorneqassapput

Minnerpaaffissaanik atuutilersitsisoqassaaq, taamaalilluni neqerooruteqartoq unnuinerit 20-t

amerlaqataannik 599 kr.-t sinnerlugit akitsuummik akiliisussaappat akitsuusiisussaataaneq
atuutilissalluni.

Akitsuut ilaatigut Europami takorniarfigissallugit nuannerineqartuni arlalinni atornerpoq.
Kalaallit Nunaanni akitsuutissatut siunnersuutigineqartut takornariartarfinni taakkunani
arlalinni akitsuutit annertoqatigaat.

Aamma takornarissanut akitsuutini akileraarutinilu pisortat karsii kisimik
isiginiarneqassanngitsut, aammali inuussutissarsiutip kissaatigineqartut
ineriartortinneqarneranut tunngatillugu nalilersorneqassasut, isumaqatigiissutip ilagaa.

Siunnersuutip sukumiinerusumik allaaserineqarnera pillugu inatsisissatut siunnersuut
nassuiaatillu naggasiullugu innersuussutigissavakka.

Taamatut oqaaseqarlunga siunnersuut Inatsisartunut suliassanngortippara.